

In clar signal dalla Surselva

Il parlament regional sustegn l'Olimpiada 2022

■ (anr/abc) Gievgia vargada ei il parlament sursilvan s'entupaus a Glion a sia emprema sessiun digl onn 2013. Enteifer duas uras ha quel tractau ina gliesta pulpida. Denter auter han ils deputai approbau il plan da finanzas dalla scola da musica. Plinavon ha il parlament surdau alla suprastanza l'incumbensa d'elaborar in concept per in forum da brattar ideas e necessitads denter politica ed economia. Cun gronda maioritad ein ils presents plinavon s'exprimi a favur dall'Olimpiada 2022.

Ei fussi impurtont da dar in ferm signal anovians, e quei buca mo da partidas ed organisaziuns. Era il parlament regional dueigi manifestar sia opiniun a favur dil project: Aschia ha il representant da Flem, Markus Gassmann, motivau siu votum. La tractanda «Olimpiada 2022 el Grischun» figurava buca silla gliesta dalla sessiun. Sut varia ha il parlament sursilvan tuttina tractau ella. Ed il votum ei staus evidents. En duas votaziuns ei il parlament s'exprimiu claremein per Olimpiada 2022 accentuond l'impurtonza dalla caussa. Cun 15 vuschs gie encunter 5 na ha il parlament sursilvan decidiu ch'ei seigi cunvegnet da s'exprimer en caussa. E cun 16 vusch gie, duas na e duas abstenziuns ha el medemamein dau in clar signal positiv pil project cantunal dils 3 da mars.

«Lein tener si las fermezas»

En siu plaid d'avertura dall'emprema sessiun dils 2013 aveva il president partent Sievi Sgier intimau alla vesta positiva ed offensiva: «Lein baghegiar in mir da fermada – per tener si las fermezas», ha el getg. Il president ha menziunau la smanatscha culla digren da plazzas da lavur. En connex cun ina digren dil consum ha el manegiau ch'ei seigi gidau pauc sch'ins mondi tochen giu Cuera per consumar caussas ch'ei dess era en Surselva. Commerci, sur-



Carmelia Maissen e Sievi Sgier ha brattau lur posts: La vicepresidenta ha surpriu pigl onn 2013 il guvernagl dil parlament sursilvan.

FOTO A. BEELI

vetschs, turissem e mistregn ella regiun seigien dependents, aschia Sievi Sgier, d'in ault product social brut.

L'emprema tractanda dalla sessiun ei stada dedicata allas elecziuns. Unanim ha il parlament eligi la vicepresidenta Carmelia Maissen sco successura da Sievi Sgier. En sia allocuziun ha ella accentuau ch'ei seigi bein impurtont da sedrizzar suenter ils centers. Per exempel cun pretender bunas colligiuziuns da traffic encunter Cuera. Adina seigi quei denton buc il pli impurtont. Aunc pli impurtont fussi da cooperar optimal enteifer la regiun e da nezegiar las atgnas schanzas che sedettien en

quella. Quei vali secapescha era pil parlament regional.

Dapli impuls dallas vischnauncas

Silsuenter ha il svilupader regional Urs Giezendanner informau il parlament davart la lavur ch'el ha prestau el quart onn ch'el ei en uffeci tier la Regiun Surselva. Sia statistica dil 2012 muossa rondund 200 contacts cun clients. 36 per schien da ses survetschs e sia cussegliuziun pertuccan il turissem. Sco Urs Giezendanner ha getg ha el impundiu temps per sviluppar products sco per exempel pils campadis Trun e Glion, per products da cultura ed architectura, per

promover letgs caulds. En sia cuorta bilanza ha Urs Giezendanner denton era exprimiu in giavisch pil futur: «Jeu sprel sin dapli propostas ed impuls ord las vischnauncas.»

Igl onn vargau ha la situaziun finanziaria dalla Scola da musica Surselva fatschentau la suprastanza ed il parlament dalla Regiun. Ni geniturs, ni vischnauncas ni instanzas superiuras havevan reclamau ch'il menaschi cuosti damemia ni che zatgei funcziuni buca bein. Il quen annual 2011 ha denton magliau si las davosas reservas. Ils davos 15 onns aveva il quen saviu vegnir ulivau cun agid da lezzas. Gievgia vargada ha il par-

lament stuiu prender posiziun tier in plan da sanaziun. Ils 22 da november 2012 aveva il parlament refusau d'alzar las contribuziuns restontas dallas vischnauncas e pretendiu che la suprastanza elaboreschi puseivladads da dumignar la situaziun precara.

Garantir la formaziun ella regiun

Sper tut quei ha il parlament sursilvan priu posiziun tier duas incumbensas che Sievi Sgier aveva inoltrau sco emprem cun 14 consutsignaders. La suprastanza dalla Regiun vegn el proxim futur ad elaborar in concept per crear ina plattafuorma pil brat d'ideas e basegns denter politica ed economia. In'otra incumbensa ha la suprastanza retschert en connex cul Center da formaziun Surselva pertuccont la repartiuziun dils loghens da scola. Unanim ei il parlament dil meini che la suprastanza dueigi contactar igl Uffeci cantonal per la formaziun professiunala. Finamira eis ei da garantir ch'ils emprendists sursilvans sappien frequenar ils roms generals alla scola professiunala a Glion e ch'els vegnien buca reparti alla scola professiunala a Cuera.

En connex culla formaziun ha il menader dil Center da formaziun Surselva, Curdin Tuor, dau ina cuorta survesta da quei ch'ei curriu e passau igl onn 2012 en quella sparta. Empau fastedis fa la demografia negativa en Surselva. Quella ha la consequenza che dameins scolars s'annunzian per las differentas scolas. In augment constatescha il menader tier la scola preprofessiunala «vinavon». Suenter in nivel ault cun 62 scolars igl onn da scola 2007/2008 era il diember sereduciun per bunamein la mesadad. Ils dus onns vargai ei il diember denton spuspei carschius ferm. Il Center da formaziun Surselva dat lavur a 110 persunas en plazzas cumpleinas e parzialas. Tier la scola «vinavon» ha Curdin Tuor annunziu la demissiun dalla menadra Monika Riedi ch'ei dapi 19 onns occupada en quella scola.

«Cader e schuldada han prestà lavur professiunala»

Rapport da la Brigada d'infantaria da muntogna 12

DA GION NUTEGN STGIER / ANR

■ In onn cun intgins puncts culminants sco cumandant saja stà il 2012, ha ditg Franz Nager che stat a la testa da la Brigada d'infantaria da muntogna 12. En l'avegnir duai la schuldada esser anc pli en furma. Noss pajais dovra l'armada da milissa, ha ditg cusseglier guvernativ Christian Rathgeb. La Brigada d'infantaria da muntogna 12 datti dapi il 2004 è la sedia principala è a Cuira. A l'entschatta 2012 ha Franz Nager surpiglià il comando da la brigada d'Aldo C. Schellenberg e venderdi envidà uffiziers, persunas da la politica e da l'economia a ses segund rapport. Da la partida a Landquart èn tranter auter er stads 700 uffiziers e da quels er blers da noss chantun. A la la Brigada d'infantaria da muntogna 12 appartegnan 7500 schuldads da sis chantuns e da quels derivan bunamain 45% dal Grischun. En ses pled d'introducziun ha il cumandant Franz Nager ditg che las truppas hajan adempli lur pensum e lur prontezza bain fin fitg bain. El ha dentant er ludà la buna lavur professiunala dal cader e da la schuldada. In fatg plaschavel saja dentant er che la generaziun giuvna tar ils caders manchia insumma betg. L'onn 2012 saja stà in onn cun intgins puncts culminants per el sco cumandant da la Brigada d'infantaria da muntogna 12

cun total sis battagliuns. En divers lieus sajan cumpagnias stadas engaschadas sco per exempel a Berna tar la visita dal schef dal stab general da la Pologna, dentant er tar las cursas da skis dal cup mundial a San Murezzan ed ad Adelbo-

den. Gist quellus duas occurrenzas conferman che events pli gronds sajan strusch realisabels senza l'agid da l'armada. Ultra da quai sajan quellus occurrenzas er ina buna occasiun per l'armada da collavurar cun las organisaziuns

civilas, ha ditg Franz Nager. L'engaschi da las truppas e da l'armada da milissa contribueschian fitg blier per la societad e sia siertad. L'effect tranter il militar e la societad saja sa cumprovà e duaia er esser en l'avegnir in model da success.

L'iniziativa da dismetter l'obligaziun al servetsch militar

Quitads fetschia al militar cunzunt l'iniziativa «Gea a la dismessa da l'obligaziun al servetsch militar» inoltrada da la gruppa Svizra senza armada «Gsoa». Quella iniziativa saja davaira in privel per l'armada da milissa. Da quella opiniun è er cusseglier guvernativ e directur militar da noss chantun, Christian Rathgeb. El ha ditg che pajais cun ina armada professiunala hajan betg la qualitat necessaria tar il personal sco en Svizra cun l'armada da milissa. Bleras persunas da l'economia privata sajan quellus che gidian a mantegnair la buna qualitat da l'armada da milissa en Svizra. En l'avegnir vul Franz Nager er schuldada anc pli ferma e perquai vul il cumandant introducir tar ils curs da repetiziun 2013 in marsch da 20 km enstagl quel da 15 km sco tar ils curs da repetiziun 2012. Tar il rapport da la Brigada d'infantaria da muntogna 12 ha brigadier Lucas Caduff, in Grischun, preschentà las novas sfidas per ina truppa d'infantaria. Da preschent è il Sursilvan occupà d'elavurar in nov reglament per l'infantaria che duai esser contemporan ed orientà vers il futur. Er quest onn vegnan intgins battagliuns da la brigada grischuna a prestar lur servetsch militar en noss chantun e tranter auter ha lieu a l'entschatta d'october in grond exercizi cun il num «Marmotta» per lung da la ruta dal San Bernardino.



Il cumandant da la Brigada d'infantaria da muntogna 12 Franz Nager ha envidà a ses segund rapport da brigada a Landquart.

FOTO Y. BÜRKL